

寓庵集卷七

行狀

陝蜀行中書省左右司員外郎郭公行狀

公諱錫字周卿世為華州蒲城縣人高祖彥曾祖偉祖彬皆有隱德不仕彬娶蘭泉先生張氏女生一男諱炳即公之父也公自幼風儀秀整性警穎舉止如成人少長業詞賦從鄉先生郭公冕君玉游在輩中嶄然見頭角以德行稱于州里遭貞祐之亂挈家遷徙無常處雖遭困厄能力學應舉凡三預京兆府薦

元 李庭 撰



一赴御簾值大朝革命旅寓河中為征行萬戶與屯
公所知因召置幕下署為參謀每事諮訪多所裨益
甚見敬禮然其好也尋歸鄉里以教授為業稍置田
園以為菟裘之計後進子弟皆師事之里中有爭訟
者往往詣公質其平因為隨事剖析曲直無不帖然
心服平居與人言恂恂樂易雖庸人小夫無不得其
懽心然志行峻潔壁立千仞苟非其義一介不取由
是聲譽大振四方士夫想其風采爭慕與之交當世
達官如故中書襄山楊公宣撫使紫川周公今尚書
雲中李公莫不致書敦請將委以治事皆辭不就中

統改元上新即大位命平章廉公恭政商公行臺陝
西兼西蜀四川事辟公左右司員外郎其所以招延
之意甚厚公不得已遂就職焉是時國家經理南方
秦蜀官府更張法度彌縫闕政日夕孜孜以救時行
道為己任嘗曰知無不言言無不盡是吾志也其所
言條目甚眾不可殫紀既而以病辭職還家以至元
五年八月初五日終于正寢得年七十有五公天資
高雅作詩與文下筆疊疊不能休以理趣為先不務
奇險平和恬淡如其為人平日著述甚多經亂遺失
故所傳者無幾晚年留意周程之學有躬行心得之

實嗚呼使遭平世置之公輔之位危言讜論展盡底
蘊功業必有大過人者無何賦命遽遭任不大顯所
成就止於此為可惜也然一時名德昭著聳動縉紳
以為關中自變故以來一人而已蓋無愧於蘭泉先
生云始娶真甯杜氏生二女長適竇次適王俱習進
士業皆先公卒又娶李氏生二子長曰某次曰某將
以某年月日舉公之柩葬于縣西賢相鄉之坡子頭
蘭泉先生故塋之側從治命也欲求當世立言之士
撰述平昔行事納之壙中仍表諸墓道以圖不朽云
以某與友四十年莫逆友詳知其人固請為行狀因

述其大槩惟作者擇而取之可也至元九年同舍友
李某謹狀

墓誌銘

元朝故洵州三河縣令兼鎮撫軍民李公墓誌

銘

宣授秦蜀五路四川行中書省左右司郎中李秉彝
命幕府掌書記員翟從善狀其父之行實以諗庭曰
竊惟先人平昔踐歷仕途力行善道志節無愧古人
柰何天不假年奄棄奉養秉彝不肖憑藉餘庇策名
天朝雖薄有廩祿而逮親之日淺復使前光翳然隨

世磨滅則為罪益大以是銜哀飲泣不遑甯處今襄
事有日思得當世立言之士叙德撰銘將以誌諸冥
冥用圖不朽庶幾少慰罔極之恩敢再拜以請庭哀
其孝心切至不暇以固陋為辭謹按狀公諱某字國
寶中都通州人先世嘗仕遼朝位至通顯曾祖某祖
某父某皆隱德不耀世葬潞陽城臺頭崗經亂譜逸
公幼習吏業天資耿介苟非其義一毫不取及冠有
廉能名州府交辟累遷御史臺掾大朝革命有司以
公前朝舊人用薦者擢為洵州三河縣令時新被兵
公撫摩疲瘵區處有方故賦斂不繁而用度足吏民
咸畏愛之未幾兼鎮撫軍民事甫及中年樂於恬退
詣所隸上書乞歸田里不許遂棄官歸隱於灤水之
上公讀佛書有所得因不飲酒不茹葷晚歲留心儒
典樂與士大夫游每正襟危坐談論終日不越乎綱
常之正釋氏之學置不復道每與諸子言事親奉上
惟忠惟孝慎勿讀非聖書惑溺心志至於財賄好之
無益祇為身累秉藝在中書平章粘合公門下公戒
之曰既已委質于人當竭勞瘁死生以之無但尸素
而已中書公亦嘗曰而父之言不可忘也其為人信
重如此既而秉藝頻歲從軍南伐以定省不時為憂

于是迎公南來卜居相下以便侍奉己未秉彝隨車
駕渡江盤桓鄂渚數月始克還家公以其年十二月
二十日歿於私第之正寢享年六十有八夫人同郡
張氏性純儉治家有法生男子二人長曰秉彝次日
秉鈞早夭女子一人適省掾王氏之子秉元孫男四
人長曰燕山亦早夭次錦山栢山道山皆業進士女
一人適中都孔署丞之子慶重孫一人七十燕山之
子也今將以某年某月某日葬公於臨漳之彭隆村
別業之側從治命也公為人個儻好義勇於敢為其
周人之急往往不自顧計初居燕為一達官所累代

償白金萬兩雖家資罄竭未嘗形于顏色與直不疑
受誣償同舍郎金何以異哉至如建白執政使天下
通行楮弊之法則足見有使民之志盛暑置淳糜路
側以困暍者則足知切濟物之心知止而退類疎傳
之高教子以忠契孤突之義且始崇因果卒蹈綱常
又似乎遽伯玉之知非凡此數者皆古人之所難而
公優為之謂之無愧宜矣昔于公多陰德而自知其
子孫必有興者史臣亦謂袁安之仁心足以覃乎後
昆今秉彝從中書公出鎮名藩周旋半天下始終左
右逾二十年功名赫然震耀當世加之嗣續藩衍家

道日昌非公平日積善餘慶能至是耶謂天道難知
吾弗信也是可以銘銘曰維古幽都人物之淵偉歟
李公道周性全公始妙齡寓迹于史業雖刑名心則
仁義白華不緇貞玉無瑕辟書交至羔鴈盈家擢佐
憲臺峨冠鶚立霜簡方騰金人已泣龍戰既息城邑
蕭然弦歌百里眾瘼齊蠲保身遺名有子而才教以
義方羽翼行臺聲震業光是宜百年享此祿養風樹
不傳奄歸壤泉本深末茂源遠流長子孫詵詵蘭玉
成行高墳屹起臨漳之渼刻詩元宮以詔千祀

故京北路都總管府提領經歷司官太傅府都

事李公墓誌銘

公諱儀字君瑞其先華州人曾高成葬州之東西溪
經亂譜逸失其名父招暨伯楫始來奉先且遷其祖
柩因而家焉世以吏為業公性方直廉介有守自縣
典史試中補華州掾佐軍謀有功累遷忠武校尉以
才幹選充陝西行六部掾尋攝主事佩銀符馳傳往
來關陝漕運糧儲正大末行部大司農保奏尚書都
省掾未及赴值關中擾攘有詔起遷京兆因寓陝州
關陝總帥阿不罕留為帥府掾既而完顏仲德行尚
書省事遂陞為省掾未幾復以阿不罕代行關陝商

號尚書省充掾如故以小心畏慎常掌邊關機密文字大朝革命癸巳秋挈家還鄉里時關中新撫定京兆創立朝廷以北京田侯有威名仍得人心命開府陝西行總省事以公前朝舊人諳練典故素有人望士大夫共推薦請為幕賓禮遇甚厚自乾鳳以西抵山外秦鞏等處尚襲全年號城守皆未下公被檄招撫秦州既至釋兵仗握空拳徑入曉以天時俾知禍福所在眾皆悅服由是聽命自知事累遷提領經歷司官嘗攝府事以年高引退閑居丁巳正月太傅國公辟為省府左右司都事嘗一應命尋以疾辭杜門

却掃不復出矣中統四年六月三日卒于私第之正寢享年六十有九娶同里前金史目王瑄之女前進士華州鄭縣令王邦彥之孫也素有賢行閨門雍睦為鄉里所稱子男一人曰惟善業進士嘗為省掾以事親引退今為京兆府路都學正謹愿端慤有父風娶前進士行中書省左右司郎中武功張徽君美之女孫男一人曰高閻女二人曰庭蘭曰尹吉將以其年九月十三日葬于咸甯縣龍首鄉神鹿里修行南社從卜食也惟善持行中書省左右司都事京兆王君世傑所撰行狀以誌墓為請某不佞素與公同里

聞故知其人為詳公安體魁秀莊重寡言與人交豁
如也夙喪父事母與兄極孝謹兄歿獨遺一女遭值
兵飢携持撫養恩義曲盡其篤於親如此自立京兆
以來綱領庶務凡二十餘年未嘗有過失一時同列
咸推重之臨政務在寬厚決獄之際陰德尤多不能
縷數今略舉一二衆所共知者在華州掌刑時渭南
縣申解強盜一行二十餘人縣司鞫問已成公再四
推訊其中數人言貌恒怯似非惡人疑為羣盜所攀
引意欲平反而招伏已定且州將嚴酷不容商訂於
是陰緩其獄不數日遇赦獲免賊酋率衆來謝曰我

輩為盜不仁又挾私讐妄引良善公每引問哀矜不
忍之心形于面目今雖蒙國恩寔由公詳緩所致其
無辜者三人伏地號泣拜謝而去為關陝省掾日陝
州受圍日久軍民絕糧不保朝夕主帥恐內變乃下
令戒約有敢私出城門者斬無何水軍五十餘人由
水門竊出野外挑菜為有司捕獲以解省府衆皆以
為必死公知無他但為飢餓所逼具以悟實言於上
主帥感悟皆獲釋免嗚呼世德下衰人心怵於利慾
首一戴惠文則視民如寇讎苟有以肥其家雖深文
巧詆陷人于死而不之恤究公平日存心主於仁恕

果不可以今之君子槩之也是宜為銘銘曰維昔田
侯來殿西秦孰主畫諾君為幕賓處繁不亂履險不
懾二十餘年始終一節撫摩疲瘵馴伏頑黨千里晏
然繫公之仁志切哀矜罪寬誥誤獄無冤民繫公之
怒于公陰德自大其門敦躬平刑慶延子孫天高聽
卑罔差報施不于其身嗣人之利咸甯之原埋石幽
宮刻此銘詩以示無窮

金故光祿大夫刑部尚書尼龐窟公墓誌銘

公諱海山別諱安仁字受之其先蓋州路人祖天世
奴金初佐太祖開國有功累遷宣武公用貴贈驃騎

衛上將軍父諱小漢世宗朝護衛以門功授蓋州路
世襲謀克贈金吾衛上將軍母蒙氏贈隴西郡侯太
夫人生男長諱益德襲父爵官至鎮國次諱按出虎
任北京神山縣令至輔國公其季也承公蔭試中正
補吏部令史積官至光祿大夫勳至上柱國爵至隴
西郡開國侯食邑至百戶賜紫金魚袋元朝革命自
大梁徙家長安以庚子年春三月二十一日薨於咸
甯縣白鹿鄉廉王村亭子頭本庄之正寢春秋七十
有三自明昌改元訖正大末凡四十餘年出入中外
踐揚要劇其行事可記者多矣而公之子所能記者

真定推官日行唐縣械送一僧誣與婦人通私共害其夫獄已具公疑其冤力白府主再遣人蹤跡之果獲正賊僧由是得免充唐鄧等處提控捕盜及贍賑時歲飢且迫冬月聞鷓鴣路一帶流民罹凍餓者甚衆公即馳驛詣親負糗糧乃勸率旁近富民出米麵散給有凍死者以氈束而圓轉之其所全活不可勝數樞密院都事日德州防禦丑奴反被檄乘傳前去收捕既至設方畧招誘散其黨三十餘萬獲渠魁轉赴闕下以功陞等灤州馬城及壽州尤有惠愛百姓咸追思之其見於政事者能如此公資和雅謙遜未嘗

忤物所至人皆愛重至於同寮莫不交口稱譽哀宗一日顧近侍問公之為人何如左右皆以好人為對曰誠如卿等言則其平昔操履槩可知已大梁既破凡簪紳之族獲免於難者百無一二而公家獨完老而康強卒以壽終嗚呼豈非為善之報耶懋德將以至元三年三月二十八日舉公之柩葬于本庄之鳳棲原從卜食也廼狀公之行事求求銘銘曰維金源氏開國始天挺虎臣佐經理躬敏積善有餘祉世生英才濟厥美尚書堂堂古君子出逢盛時登臚仕克勤于邦儉于己晷如白華不痕滓揚歷中外餘四紀

勲業煌煌照青史招搖耀芒天地北崑崗火炎玉不
毀五福兼全疇克比天報善人有如此佳城鬱鬱南
山底黃壤埋銘書業履騰寔飛聲千萬祀

大元宣差陝西京兆府總管大夫人尼龐窟氏

墓誌銘

夫人尼龐窟氏故金吾衛上將軍定國軍節度使僕
散公諱某之妻也家世蓋州路人其先本女真貴種
曾祖諱天世奴贈金吾祖諱抄東北路招討使俱世
襲謀克父諱醜的世宗朝護衛出身累遷宿直將軍
娶木路世襲牙刺哥千戶完顏公女生男一人諱合

申女三人夫人其長也妹福引適東京留守唐括公
次男福受次妹福聚適咸平路宣撫使蒲鮮公長男
帖哥夫人年若干歸節使公逮事祖舅開府總管祖
姑郡公太夫人移刺氏暨舅尚書右丞延安郡王姑
王夫人石扶氏服勤婦道者餘五十年累封得某國
夫人生男子六人長曰沂信武將軍黃河漕運提舉
次曰淵明威將軍選充護衛次曰湛宣武將軍汝州
寶豐縣令皆先節度使公卒次即總管公也次曰源
見充宣差走魯花女一人適平章樞密院元顏公之子
奉御元平奴孫男七人長老山宣差同知京兆路總

管襲父職也次某以中統三年春三月十七日丁酉
終於私第之正寢享年七十有八卜以其月二十九
日己酉祔葬於京兆府咸甯縣洪同鄉鳳棲原節使
公之墓禮也竊維夫人生長華胄天資淳直寔有賢
行事舅姑以孝相君子以順闔家五十餘指經紀內
外無不得宜子孫振振俱有名位閨門之中肅如也
故近世以來言家法者咸歸焉既享榮養復終壽考
嗚呼若夫人可謂有全福者矣是宜為銘銘曰維節
使公奕世名家弼亮四朝德音不瑕孰為內助有婦
柔嘉六子堂堂咸躋顯仕逮總管公益濟其美孰其
教之實繫母氏已賢其子又才厥孫蟬聯彪懿為時
慶門華屋高軒既貴且富年終八帙不為不壽鳳棲
之原闕此元堂刻詩貞石示復無疆

故宣授陝西等路達魯花赤火谷公墓誌銘

公諱唐兀反小字真住其先本遼東臨潢路女真人
金國初從太祖武元佐命有功世襲謀克其後子孫
枝分派別有居西京下水鎮深井村因以為家數世
墳塋在焉曾祖父某祖父某經亂逸其行事友衣衾
伯通住皆個儻好施予為鄉里所畏服會天兵起朔
方遂相與歸命太祖承吉嗣皇帝因署通住為千夫

長友郅副馬令將兵攻西京連戰破之太祖大悅錫
通任金符加招討使益分兵數萬人因併力南下徇
城邑之未附者所至無不披靡既累立大功太祖愈
加獎重擢通任為山西路行省兼兵馬都元帥召友
郅充護尉俾世食真定之威甯晉鉅二縣租賦以旌
其勞通任尋以疾薨合罕皇帝詔友郅嗣其職令公
襲護衛兼奉御佩以金符時年十三召見喜甚遂賜
今名未幾友郅亦薨蒙歌皇帝即位有旨授公陝西
等路打捕戶達魯花赤兼權京兆延安鳳翔大魯花
赤以中統三年三月二十七日病卒于家得年才四

十有七夫人宋氏生男一人曰千奴女三人長適某
次適楊某次尚幼將以某年十月十九日舉公柩葬
於威甯縣少陵鄉東姜村之東原從卜食也公為人
內明敏而外沈靜舉止審詳出入兩宮禁數十年無
纖介過失居官有惠愛人思念之至今惟天不假年
設施未盡其才而死為可惜也始遘疾不愈宋夫人
左右侍湯藥朝夕無少懈既歿與其姑孤銜哀喪事一
切遵命可謂賢也已於是遣其壻偕千奴奉功緒之
錄來謁銘某方從予問學再三以為請義不得辭遂
為之銘詩曰龍翔虎躍風雲助之勢兮帝興王成豪

傑贊其計兮赫赫大家人材踵相繼兮翊扶景運大
業光以濟兮剖符錫壤恩賞延于世兮胚胎前光公
寔生而慧兮大福再成家聲庶不替兮奔驥騁力中
途踈以斃兮秀而不實造物何其戾兮天其或者將
使昌後裔兮刻詩墓門維以詔千歲兮

金故朝請大夫同知裕州防禦使事王君墓誌

銘

自隋唐以來相沿用科舉取士歷數十百年其間名
卿大夫磊落相望可謂盛矣降及近代教養之法廢
人材不逮古遠甚至於藝業往往偏駁不純工文詞
者或缺於行富學問者或昧於政求其所謂全德君
子蓋絕無而僅有焉今玉華先生華陰王君其庶幾
乎君諱元禮字元禮世為華陰人曾祖橫隱於繪事
祖浩父珪字子玉始業儒有子四人長曰安仁次曰
安上安雅安貞以安仁有幹蠱材恚妻以家事仍誨
之積累過荒歲則下其值以濟飢民賴以全活者甚
眾鄉人以此德之安仁即君之初諱也資穎悟少力
學讀書雖祈寒盛暑不廢不數年一時同舍生皆師
事之初任郡庠日夢唱名云華陰玉元禮登第騎從
前導行至一觀有羽衣人出迎儀觀修整類古之得

道者既而相從上殿所語皆塵外事又二道者侍其
旁顧謂君曰子前身中條山玉華洞主也詰旦以語
同舍皆曰佳兆遂請更名元禮仍以玉華自號未幾
登興定五年進士第初調防州中部主簿改辟乾州
奉天縣令自軍興以來調度繁夥民不聊生逋竄者
十七八吏因緣為姦戶口日耗賦役無所仰給君初
到官詢知其弊即白有司乞為蠲免公文凡三上而
後獲從仍實驗編戶貧富再為銓次之懲其慢法蠹
民尤無良者由是姦吏哀止一境遂安在任三年下
無冤民獄無滯囚至今人猶以佛呼之會天兵南驚

兼義軍都統再授隆德縣丞未赴遙辟興平縣兼平
涼府錄事佩銀符綬戢軍民咸得懽心未滿補省掾
再遷朝請大夫同知裕州防禦使事壬辰京城受圍
有客門款話意欲相拉北遷君曰余雖官職卑微叨
食廩秩餘二十年愿得死京城足矣幸無復言客謝
而去無何京城陷遨游河朔者凡七年己亥秋徙居
洛陽一時賢士大夫如紫陽楊先生翠嶺張先生李
九山子微楊西菴正卿皆晨夕與之游紫陽又其姻
家平生尤相得遷徙流落未嘗一日相離乙卯春始
歸故里以遭時多故五世不葬者凡七十喪皆舉而

定之于縣西南五方村舊塋之西二里許丁巳病革
臨終戒家人勿遽哭俟續息定移時舉哀言訖而逝
實五月三日也享年七十有三夫人李氏性賢明理
家有法度鄉黨姻戚一無間言繼室文氏京東漕司
度判諱某之女也子男一人曰亨女二人長適任氏
次適象氏孫男三人曰黑廝曰慶壽皆早夭曰頑童
尚幼孫女一人適華陰劉尉之子清亨將以某年月
日奉君之喪葬于先塋之趾以夫人李氏文氏祔焉
從治命也於是持三華楊定季靜所撰行狀來謁請
銘庭與君同鄉郡所居相去不百里而近知其出處

行事故不敢以固陋為辭君為人沈靜寡言溫雅有
蘊籍及臨事剛決能斷始以壯年唾手取甲科慨然
有經綸當世之志既而遭時擾攘淹留州縣仕不大
顯顧胸中底蘊百不一施惜哉方在職時亨尚幼其
所施設不能詳記故論次止於此然當時政聲流聞
故人父老舉能道之不可掩也且自陵谷遷變以來
一時士大夫虧名損節以取通於世者多矣而君獨
窮守道恬然不以勢利干其懷則所養可知也平居
好讀易有通其義者不遠數百里必往質問之暮年
尤喜理性學故能於死生禍福之際安時處順無少

疑懼豈非有得於心者歟是宜為銘銘曰巖巖太華
作鎮西秦儲靈蘊秀乃生哲人哲人為誰玉華先生
學以勤積德由天成遊戲場屋儷玉駢珠手攀丹桂
高步天衢出宰百里煦民以慈至今遺愛老稚歌思
有蘊無施逢時之屯澹乎自守不縉不磷二楊張李
一時名豪相從洛濱詩酒遊遨潛心易學洞究精微
晦而不耀知我或希淵兮似道允也其仁年開八秩
備然反真先塋之趾闕此幽宮埋銘紀德以示無窮

故西蜀四川都轉運使王公墓誌銘

維至元九禧歲金壬申春正月二十三日西蜀四川

都轉運使王公卒將以夏四月某日奉其柩定于龍
首鄉之宣平坊從卜食也夫人張氏暨嗣子徵銜哀
襄事廼持前京兆府詳議官汾陽王君雄飛所作行
狀來謁鄙文將納諸壙中以圖不朽王君誠實士素
與余相好也且徵亦嘗從予遊故不容以不敏辭謹
按其狀序而銘之公諱楫字濟川下缺雲雷方屯天地
革風塵瀕洞九域塞真人勃興斗北側截斷鼇足立
四極三秦蕭條盜充斥廼建行臺俾宣力孰居幕中
主籌畫堂堂王公萬夫特驅除豺狼剪荆棘百司庶
府各職職休風暢洽氛祲息千里遺黎樂耕織仇方

來臣皇怒赫雲棧天梯飽行役捷音屢報境土闢我
馬元黃非所感帝頒璽書嘉迺績省郎漕司薦陞陟
丹誠炯然期報國日薄虞淵忽沉溺佳城鬱鬱南山
側埋辭幽宮紀功德千秋萬歲陵為谷欲知其人視
此刻

大朝宣差京兆路總管僕散故夫人溫迪罕氏

墓誌銘

易著家人禮標內則五典載之寶訓二南首乎國風
是知齊家之道不獨在於男子抑亦繫婦人焉去古
既遠王教陵夷鳴晨之勞屢彰反唇之風彌甚至子

閨闈之間柔儀淑行寂寥無聞者久矣其能體具四
德外睦六姻有輔佐君子之勞盡服事舅姑之孝吾
於今宣差京兆路軍民總管僕散公夫人見之僕散
公諱浩字某龍虎上將軍定國節度使兼同州管內
觀察使諱某之子開府儀同三司尚書左右丞相都
元帥延安郡王諱端之孫儀同三司真定路兵馬都
總管諱某之曾孫夫人姓溫迪罕氏父諱某字某登
某年策論進士第官至正奉大夫工部侍郎母郡侯
夫人移曳氏生三男一女長男兄曰仲溫金朝護衛
隨駕至蔡州歿于王事次弟曰仲良權京兆府事次

某未仕一女即夫人也和柔淑哲出於天性結髮執婦道內外無間言遭大變之後節使君暨大夫人泥龐古氏俱無恙夫人與公朝夕佐餼問衣燠寒奉養不懈二十餘年可謂孝矣舉家私屬五百餘口善則賞之過則隱之無所遠近視之如一可謂德合鴈鳩矣子男二人長曰蒲鮮早卒次曰老山宣差同知京兆路都總管女四人長曰福詮自幼出家為尼次適平章兼樞密使芮國公孫兀可次適宣差明安靖福定次適宣差延安路都總管表以中統元年八月十三日終于私第之正寢享年五十有一粵以某年十

月十五日遷窆於咸甯縣洪固鄉鳳棲原之廉王村從先塋禮也迺遣前行省郎中彫陰謝某狀其行來請銘某不獲辭遂序而銘之曰於惟夫人世胄高華天作之合嬪于名家舅姑在堂朝夕甘旨小心兢兢以佐君子女宜于家男達于邦婦德母儀于今無雙是宜康強以享多福云何中年奄終壽祿滄川之西埋玉重泉刻詩墓門以永其傳

故宣差京兆府路都總管田公墓誌銘

公諱雄北京人父資榮母張氏公早孤能自立身長七尺善射與槊膂力絕人大安末天兵大入所向城

邑崩潰公附北京師木達以身歸大朝署提控佩銀符時年二十有二實隸先太師從軍南下收中州轉戰萬里凡獲四十餘城所至常先登陷陣功在諸將右時太師以王爵統諸道得承制拜封授公隰吉州刺史兼鎮戎軍節度使易金符庚寅先帝新登基將親舉兵南伐迺大集諸將問以方略時餘人各有所對公獨無言上問故對曰異日遇勍敵出死力當自見之今奚言上大悅更賜符印陞千戶充御前先锋使明年從駕至陝西既破鳳翔駕還詔公率兵從主將按只解道漢川以取河南踰漁門拔興元徑擣襄

鄧壬辰春車駕會于鈞州遇全軍公以勁卒鏖三峯下大破之河南遂平被旨招城邑之未下者不逾月下十三城獲生口一十三萬七千戶有奇及北倚渡河悉縱遣之癸巳詔書命公鎮撫陝西秋九月至京兆屬關中新被兵城郭蕭條不見人迹殘民往往竄伏山谷間相與捋草實啖野菜以延旦夕之命強梁嘯聚伺隙相攻掠迺遣人四出移書招誘賊盜望風皆束手歸附於是水陸運漕河東之粟以濟飢羸益市耕牛子種以給之因此農事日修人用饒足北自廊延西鳳翔東南及商華州縣皆置長吏五六年間

流通悉歸市井依舊全秦千里遂為樂郊甲午宣賜
金虎符以太原平陽兩路軍皆隸麾下戊戌赴闕見
其三子上喜甚賜名馬細甲弓矢佩刀俾專意征蜀
拔成都定五十餘城皆有功今上即位有旨思見公
丁未春三月發自京兆七月丙寅入覲慰藉良厚八
月得疾上遣太醫診視弗瘳甲申薨享年五十有八
上聞震悼詔長子大明襲京兆府等路兵馬都總管
次大器入直宿衛次大成襲陝西京兆府等路都總
管佩虎符俾護其喪歸長安以己酉正月辛丑葬于
咸甯縣洪固鄉鳳棲原從卜食也襄事有日以前進

士太常寺丞高陵陽公狀來請誌其墓固辭不獲已
嘗試論之公以魁偉豪邁之資適遭興運依乘風雲
遂立功業當大敵在前提戈犯陣所向披靡大小百
餘戰身創五十創雖古名將無以加及受命西來弭
節闕右獨能專崇惠愛摩撫凋殘思涵涇澤濡闔境蘇
息斯不亦勇者之仁乎宜其下車以來開河響動懷
赴如歸十五年間人心感戴聞訃之日識與不識莫
不悲悼嗚呼可謂有遺愛矣昔人有言活千人者子
孫必封公平昔之所全活者不可勝數視履考祥田
氏之福蓋未艾也子男十人曰某女八人俱適名族

孫六人銘曰天朝造邦豪傑宣力矯矯田公萬夫之
特四方未平公為禦侮履鋒陷陣闕如虓虎所當者
破維公之武奮迹乘時噓雲嘯風縱橫百戰卒定區
中大業巍巍惟公之功帝曰欽哉汝功予嘉尹茲西
土大纛高牙往保遺黎其靖予家始公之來千里蕭
條遑遑殘民憔悴無聊風刀外割飢火中燒磨牙相
噬夕不謀朝迺啟城郭乃立官府強暴我招羸瘠我
撫爾安爾室爾闢爾土曾是蓬蒿化為禾黍昔饑而
啼今飽而嬉四郊煙火老稚熙熙秦民戴公如父如
母祝公百年富貴壽考萬里朝天銘旌北來膽裂心

摧莫知我哀茂德元勳成而不有天或靳之俾昌厥
後鳳棲之原有樹有封納銘幽窆以示無窮

故尚書行中書省講議官來獻臣墓誌銘

歲癸亥冬十月二日甲乙行中書省講議來公以疾
終于私第之正寢春秋八十有一臨終神識不亂命
家人具紙筆迺自序其世族譜系暨入仕止官本末
仍手書之以付門生駱天驤李惟善俾求當世立言
之士以志其墓遂妄以屬諸不肖謹按公所自序其
先京兆人也高祖士衡曾祖祐祖華國並葬于咸甯
縣龐留村華國當全國正隆間掌闕中儒教人號為

關西夫子父補業詞賦以四舉終場當賜第未及受
恩而故改葬于長安縣范家庄娶張氏生三子長曰
同利次曰獻臣次曰時英獻臣即公也登興定五年
詞賦進士第釋褐調河津簿兼管勾河防事待次間
陝西行省差權京兆推官提控四面防城等事凡四
載其後之任正大六年以河防事升充河渠司管勾
尋補都省掾累遷奉直大夫加飛騎尉賜緋銀魚袋
考未滿值天兵南下遂流轉他境癸巳徙居平陽乙
未行中書省劄充太傅國公府議事官中統元年陝
西行中書省辟為講議官三年以年老辭職閑居鄉
里日與諸耆舊談笑為樂初娶祁氏生三子皆不育
再娶劉氏河中名族聰明有賢行能持其家年今八
十四尚無恙次室薛氏生一女適陝西都元帥府王
郎中男先公卒將以某年月日舉公之柩葬于范家
莊祖塋之側祁氏祔焉禮也公字明之頤軒其自號
也為人沉重雅正與人言惟恐傷之至臨事剛決有
勇不畏疆禦雖平時桀驁有權勢者不敢犯以非禮
自其祖華國以來三世皆以文學著名為陝右儒門
之冠可謂盛矣然春官之選屢敗于垂成至於公銜
憤畜力麀棘園中卒取捷而歸非有志者能之乎當

蒞官之日其治迹必多有可稱經變既久遺民故老
零落殆盡無所徵考顧公肯區區自列刑之耶建其晚
歲其安時處順優游鄉社不妄造請是以年高德邵
聞望日隆一時達官貴重莫不賓禮人無賢不肖皆
曰先生純德君子惜乎數有子而輒失之卒以無後
嗚呼天之報施善人果不可以正理推測也系之以
銘曰壯哉長安古都邑俊德英才恆至集來門三世
攻儒術父子嗣章相甲乙大名屢成還屢黜否極而
亨公乃出橫掃千軍操巨筆唾手魏科如芥拾衣錦
鄉關耀白日身列王宮豐廩秩翱翔蘭省聲輝赫一

夕銅駝墮荆棘歸來故里樂閑逸高會耆老推第一
官幾五品年八十五福兼全人罕匹丈夫蓋棺志已
畢後事悠悠非所恤佳城鬱鬱南山側吁嗟先生居
此室千秋之後陵為谷欲知其人視此石

元故三白渠副使郭公墓碣銘

公以乙卯年十月初四日卒於京兆府景風街之寓
居權厝于城東南坊之精舍後己卯歲夫人雷氏踵
門來告曰將以今年十月十一日遷公之柩葬於蒲
城縣高城村乾柏原從先塋也敢以碣銘為請竊惟
庭與公同鄉同舍相得歡甚且變故以來交游零落

殆盡獨不肖為後死今夫人有命敢不敬承謹撫其實序而銘之公諱時中字器之其先太原人後徙居蒲城遂占籍焉高祖諱機曾祖諱完祖諱達考諱瑞世以財雄鄉里皆隱德不耀妣同里杜氏生一男子公其長也羈州嗜讀書穎悟強記少長業詞賦才思敏捷迥出倫輩府試第三人一赴殿簾戊戌歲天朝開選舉公試西京復中第三掄魁多士監試官木虎乃辟公為山西東路考試官明年携所業謁中書耶律公於和林城一見即加賞異屢有詩相酬和時方議涇水故道溉民田公為條利害委曲皆合中書公

意遂牘奏之上以為材升其階為三品命公為貳仍賜銀符畫錦鄉社林榮之到官規畫有方收倍常歲民賴其利既而護前者媚其功乘便相譟嗾公恬不與較平章廉公行臺陝西署公經籍所官因徙家來京兆未幾得疾遂不起矣春秋六十有一先夫人王氏前公卒生一男崇期後公之歿二十四年客死長沙有孫曰汝欽女曰壽哥再娶翰林學士監察御史渾源雷公之女生一女適京兆袁忱業進士雷氏有賢行公歿後誓守志終身人謂有共姜之操焉監察御史王暉以聞其辭有在雷門善繼先聲適郭氏誠

為節婦之白蓋寔錄云公之弟時舉卒于平水積有
年矣弗克返其葬夫人慨然以為己任匍匐千里不
憚苦躬取其櫬還葬先塋時人以此多之公天性孝
友時舉百負之了無怨言中年以後愈篤志於學百
家之書無所不覽下筆輒數百語文辭煒然未嘗蹈
襲前人工書法善談論喜為後進講說經史聽之纒
纒然令人忘倦有文若干卷行于世嘗試論之使君
遭時奮身得位其事業必有大過人者惜乎生遇亂
離流傳無甯歲雖晚得一官又不果行其志抑鬱以
死豈非命也銘曰猗歟器之生膏梁蚤歲學問能自

強白衣奏賦入明光聲華眩耀驚四方真人龍飛北
斗傍明詔郡國徵賢良公乘其時亦騰驤擣華發藻
中書堂晝日三接恩非常高車駟馬還故鄉圓鑿方
柄難相堂勞之不圖祇謗傷冥冥造物孰主張善不
必福仍罹殃奉先古原柏蒼蒼封高馬鬣公所藏立
石隧首刻銘章千秋萬祀示不忘

墓表

故高州安撫使成公墓表

孝莫大於顯親此前哲之格言也蓋人子有不幸不
能終養其親而于既歿之後撫親之功寔行義懇求

當世立言之士發揚論撰著之金石傳于後世使不
與草木俱腐以自慰其疇昔養親不足之心亦可尚
也已長安成氏子幼從予游年甫及冠而喪其父自
痛生之晚而親歿之亟不獲伸于終養之志故纍然
衰絰之中拳拳求予文以表其墓拒之再三而請益
堅為之銘曰火辰暉輝金祚終中原鹿走兵叢叢公
乘其時起蒿蓬手提長劔隨元戎指麾萬騎疾于風
剪除強梗蘇疲瘵捷書飛報達九重玉麟剖符酬雋
功杞人一夕憂天崩簣土莫障洪流東運開朔野飛
真龍四方豪傑如雲從老鵬垂翅倦搏空一枝甘與

鷦鷯同人以富貴笑厥躬知止不殆孰如公年登八
秩資用充奉祀有子續其宗天之報施亦已豐樂遊
原西卜幽宮高墳前直終南峰鐫詩翠琰傳無窮

神道碑

大元故宣差萬戶奧屯公神道碑銘

龍興雲從虎嘯風冽君臣際會千載一時淮陰屈於
楚而伸於漢李勣晦於隋而顯於唐蓋聲應氣求天
同神比不期而自合不介而自親故能樹偉績於當
年垂榮名於後代今吾鄉宣差萬戶奧屯公其庶幾
乎公諱世英字伯豪小字大哥其先居上京胡里改

路全人破遼東最後得闕中相地列營分軍鎮守公
之祖得蒲城子孫因而家焉公之祖曰黑風佐太祖
武元征伐有功封王曾祖兀出益都府兵馬都總管
祖蒲乃襲爵為千夫長父閏僧昭勇大將軍新平縣
令公自幼能自樹立與羣兒聚必以官長自居眾環
侍如吏卒指呼使令惟命是聽其英雄氣槩已見於
髫鬢年中矣甫冠以廕補官薦歷差遣丁亥歲任郟
水酒稅監就充征行都統領軍至慶陽與天朝大軍
相值公度其眾寡不敵徒死無益遂率眾歸降以材
武為皇伯撫軍所知薦之于列祖成吉思皇帝上亦

喜眷愛甚厚屢降恩旨仍賜虎符俾隸朵火魯虎徹
立必麾下效用庚寅歲王師復下陝右公與扎古帶
偕至富平主帥命諸將分主其地公以桑梓之故愿
得蒲城帥從之至縣下令諭眾曰爾輩穴地以為固
不足恃也王師此來為久駐之計爾輩詎能延歲月
即吾畚鍤已具非不能掘地及泉隧而相見願以鄉
里之舊弗忍為也爾能從吾令當還爾父母妻子復
爾居業不然則虀粉矣眾相謂曰公信義素著今為
一方司命其言必不食盍往從之于是相率出降公
溫言慰遣之眾意遂安時諸將之在它邑者惟事屠

戮編民連頸就死間有漏網者皆裹瘡扶病無復生
意視蒲民按堵如故莫不指以為樂土至今人物繁
庶屋宇具存垂白僂僂扶杖往來者踵相接于道非
公曩日保完之力能至是乎蒲城既下公與大軍復
合同攻郿城既平鳳翔擊五峯山自隴州入一五里
破鳳州取武休關至興元攻西和又攻鞏州再入宋
境從宋考四大王大軍由興元歷金洋州所至城寨
無不降附復徇唐鄧拔釣許鑿三峯山下遂破金軍
及奉上命鎮守河中招收天和人二堡爾後偕塔
海都元帥累歲征南十餘歲間其勤勞亦已至矣皇

伯合罕皇帝在鳳翔也許公以河中府尹之職命未
及下會以它事不果其後公入覲上喜曰曩之所許
今當相付命有司草制公奏曰臣名在四大王府有
年今改屬別部何面目見唐妃子母乎上始怒徐復
喜曰爾言是也唐妃聞其言喜甚四大王嘗謂妻子
曰大哥吾所愛爾輩勿以降虜視之及是待遇益厚
與家人輩無異以至唐妃親視公肥瘠裁衣制帽以
彰殊寵辛丑歲夏河中船橋官謝以事誣公訟于有
司奪公虎符唐妃聞之大怒言于上復以虎符畀公
仍命皇兄蒙哥大王親草懿旨謂大哥以有功之故

朵火魯虎奉成吉思皇帝聖旨錫此虎符不可奪也
仍授以萬戶之職今上皇帝在潛邸子貞入見蒙降
恩旨亦歷叙迺父之功歲某月某日以疾卒于河中
公解之正寢春秋六十有二以辛亥年十月葬公於
蒲城賢相鄉萬勝原先塋之側夫人竹魯頑氏先公
卒張氏出家為文冠後公卒完顏氏亦先公卒再娶
完顏氏今無恙二完皆全名族俱有賢行二子長曰
貞次曰亮壬子三月完顏氏絜貞入見蒙哥皇帝帝
知其為大哥子甚憫惜之復錫虎符仍降恩旨時貞
年甫十三今上皇帝即位貞復入見其所寵錫與先

朝無異也公狀貌魁梧宇量宏廓外若矜嚴中寔樂
易輕財重義折節下士人無賢否交必以誠家無一
錢之積秋毫不以取于民其為人槩可知也性至孝
王師之圍慶陽也全國遺盧骨鎚領軍赴援公統眾
在前列家屬居後遂為金軍所得公自度忠孝不兩
立狼狽北歸其在北方也思親之心愈久愈切每夜
焚香祝天愿得生過父母以報罔極之恩死不恨矣
言訖仰天號呼哀動鄰里眾共止公則欷歔就寢淚
濕裯席凡數載間率以為常上憫之天語慰諭期以
必得及王師下河南公以父母之故愿備行伍於是

上下令軍中曰得大哥家屬者生致之無使驚怖壬辰二月攻許州城既陷有唱者曰奧屯公家屬在此公馳往視之闔門百指圍樂如故公抱持涕泣悲喜交集人以為孝感所致于是昇歸河中益恭子職至於溫清之禮甘旨之奉必極其至時人榮之始公之來河中也挈河南俘民老幼九千口以乏食之故與總管扎古帶同請于朝有旨令平陽撥米九千石給付之時粒米如珠餓莩盈野藉此官糧獲濟者衆公之力也每來蒲城闔縣老野出郭遠迎公下馬拜跪握手懽笑同行至衙命酒遍酌三行迺已不以勢位

驕人故能大得衆心未老便欲退閑作知止歸來二堂此志竟不遂惜哉傳曰陰德有陽報公所全活不可勝數其陰德可謂厚矣然才大而不見于用祿薄而不稱其德嗣續雖立而不及見其成人天年雖終弗克登于上壽所不足于公者此也使世之人不免有為善之疑天其或者將大畀後之人乎癸亥春僕方僑居長安嗣子貞奉前行中書省左右司員外郎郭君周卿所撰行狀來謁文以表其墓顧惟才學淺陋何足以當此然以往年亦嘗受知于公義不得辭且吾友周卿名德素為鄉里所推服在公幕下凡十

餘年知公行事為最詳其片言隻字足以取信於天
下後世僕何容喙焉故一依來狀次序而贅以銘曰
全行既微天道在北真主勃興羣雄効力公乘其時
利見西陲授以虎節洞然不疑天兵四馳如火烈烈
千里僵尸百城漂血漂叢爾吾邦假息須臾天誘其衷
難俾吾紆公既戾止不驚不懼響動闕河有來肯悅
姜枯以膏桀驚以馴凜凜洩寒化為陽春完我室廬
活我老稚人被其恩家受其賜鬻生敵國塵隔南陔
望雲淚濺陟岵心摧至誠感神有愿必遂離而復合
恍如夢寐版輿載御言還故鄉朝夕薦羞滄瀨馨香

薄伐南方轉戰萬里十有餘年勤亦至矣惟帝念功
俾尹于蒲辭榮就義始終靡渝謙以得眾廉於奉已
孝盡庭闈仁庇桑梓宜公宜侯壽考百年一債不起
埋恨重泉餘慶所鍾承家有子大福再成公為不死
有佳者城闕彼高原豐珉紀德百代常存

解州鹽池重修二王神廟碑

按尚書洪範五行一曰水水曰潤下潤下作鹹此鹽
之根本也五行之氣無所不至水周流于天地之間
潤下之性亦隨所寓而有焉其味作鹹凝而為鹽鹽
之所出品類頗多就其最著言之其出於海與井者

須資人力烹鍊而成出于解之兩池者則治畦其傍
盛夏引水灌之得西南風起一夕成鹽蓋資于天非
人力之所能與也天之造化神寔司之此有司所以
致謹於祀事焉而不敢忽歟夫鹽食肴之將生民之
用而不可闕者也殷高宗命傅說曰若作和羹爾惟
鹽梅周禮鹽人掌鹽之政供百司之鹽圖經引穆天
子傳有安邑觀鹽池之語春秋左氏傳成公六年晉
人謀去故絳諸大夫曰必居郇瑕氏之地沃饒而近
鹽鹽即此地也歷代以來皆置官司漢武帝以東郭咸
陽孔僅為大農丞領鹽鐵事鹽利之興始見於此後

魏及隋嘗舍其禁與民共之然為富室專取而貧民
重困乃復歸之于官唐初隸度支歲得鹽萬斛以供
京師廣德十二年秋霖池鹽多敗度支侍郎韓滉奏
雨雖多不害鹽仍有瑞鹽上疑其不然遣諫議大夫
蔣鎮往視之還奏實如滉所言乃賀帝請置神祠錫
以佳名上從之號曰寶應靈慶池封神曰靈慶公宋
兩池置官八而州有權鹽院守二領之使民入粟塞
下與鈔以給鹽一歲之出無慮四十萬習其利既博
而法益密矣元符元年霖潦彌月溝澮皆盈壞官亭
鹽室不可勝計講臣議士使駟旁午睥睨惶駭莫知

所以拯乏之術崇甯四年春遣耀州觀察使王仲子
發丁夫回山谷之泛濫完隄防之缺周池之堦作護
寶隄百餘里又于隄之內起外堰以殺水勢外患既
弭客水浸涸是歲鹽寶初成凡境內祠廟皆錫之封
號兩池之神東曰資寶公西曰惠康公初年課纔十
二次年倍之越三年遂底成績大觀三年加以王爵
金朝因之解州安邑皆有神祠經金季兵火蕩無孑
遺其環池地鹹澗皆不可井飲惟兩池中間有淡泉
水特甘涼舊有龍祠崇甯間封為普濟公歲當炎暑
常役萬人取鹽苟勺飲不繼則渴死者過半酌泉飲

之則免於病聖朝開創就泉北二里許詔鹽司事至
癸丑歲今上皇帝方經畧川蜀規措軍儲用度置從
宜府隴西李侯某寔當其任值頻年霖雨遽失其利
咸以國計為憂乃禱於神寶氣凝結遂收五歲之積
奏奉聖旨建立二王神廟俾春秋祭祀焉於是鳩工
聚材舍舊圖新建正殿於中央翼以列廡繚以崇墉
像設儀衛煥然一新經始于某年月日落成于某年
月日乃不遠數百里遣介來長安謁予為記予告之
曰嘗聞天下名山大川有能產財用者考之祭法宜
在祀典况茲寶池歲出億萬計所以佐國用備邊儲

通商賈之貨省飛輓之勞誠公家之外府也財用之
產孰踰于此是宜廟食其神以報休德因為叙其興
造歲月俾刻之石而繼之以詩曰解梁之野天啟靈
池賦醴是產軍國攸資歷代明王咸勤祀事旨酒馨
肴以答神賜炎炎劫火廟貌丘墟瓦礫荆榛狐狸燕
居聖哲臨朝德參天地地不愛寶日增課利愛擇爽
愷載葺新宮棟宇華煥像設尊雄宜千萬年饗此血
食刻詩貞珉垂名罔極

謝張平章啟

伏以陋巷棲遲方守固窮之節大臣論薦遽膺錫命
之榮再省妄庸一何僥倖竊聞學校為風化之本師
儒任長育之權苟非博極於羣書無以作成於多士
如某者閭閻寒族章句腐儒未嘗窺前聖之藩籬何
足為後生之模範豈期白首誤被皇恩茲蓋幸過某
官秀出幽并名宣禹甸值千載風雲之會依九霄日
月之光方勸相於國家思旁招於俊人遂令疎賤亦
玷甄收某敢不砥礪初心溫尋舊業當青衿廢學之
後粗使有成答黃閣好賢之心庶乎無愧過此以往

未知所裁謹奉啟以聞某不勝激切感佩之至

壽表

伏以氣肅金行當萬寶收成之候祥開虹渚正一人
震風之辰凡在照臨舉增抃蹈恭惟皇帝陛下勇智
天錫輝光日新繼四聖之經營荷三靈之贊助用兵
有道應變如神萬馬渡江幾破吳王之膽偏師授鉞
竟摧齊寇之鋒造邦本藉於武功飾治兼崇於文事
制作禮樂潛安七廟之神刪定章程永作一朝之法
雖大功之昭著猶小心而不遑蓋九重宵旰之勞念
百姓艱難之事宣德音而導迎和氣遣信使而釋放

因徒罄萬宇以交歡同一誠而仰戴宜荷降年之永
式彰申命之休臣久悞聖知猥叨外任雲天在望阻
稱北闕之觴葵罄藿傾心願祝南山之壽

又

伏以氣肅金行時屆素秋之節虹流華渚天開上聖
之祥凡託蓋容誰非舞蹈臣欽惟皇帝陛下性資嚴
哲運御休明繼四聖之經營荷三靈之眷祐以仁守
位仗義行師金戈南指則百越寒心羽檄東馳則三
韓屈膝足地一民莫非臣妾異方萬里盡入提封既
外耀於武威迺內修於文教屈己而招來賢士虛懷

而容受直言載振朝綱一新官制輕徭薄賦至矣為
民之心平獄緩刑大哉好生之德歷觀盛事應享遐
齡臣久沐洪恩叨臨遠郡阻趨玉陛徒深戀主之心
敬捧霞觴願祝如山之壽

又

伏以皇天佑德式開長發之祥華渚虹流爰紀誕彌
之節時惟普率靡不謳歌恭惟皇帝陛下運應千齡
慶承五葉大度有同於漢祖小心更法於周文聽言
達幽枉之情為政尚寬仁之德威加方外澤被區中
龍堆葱嶺盡入於提封桂海冰天悉為之臣妾藹四

郊之和氣沸萬里之歡聲值此清商實為慶旦臣肅
將使旨叨領外臺造百執事之趨阻陪北闕罄萬斯
年之祝但祝南山

聖壽祝文

伏以寶曆授時適遇迎寒之候瑤光貫月正當誕聖
之辰罄四海以懽忻同一心而祝贊具官某等肅將
明命出殿遐方阻陪就日之班徒切望雲之意伏願
皇帝陛下百神叶贊諸福駢臻被聲教於八荒混車
書於萬里優游泰已長居北極之尊安樂延年永享
南山之壽

老人星致語

西風入律當一人降誕之時南極騰輝應萬歲壽昌
之兆幸良辰之邁止罄率土以懽然敢為耗荒輒停
贊祝恭惟皇帝陛下堯仁舜孝禹儉湯寬丕承祖業
之隆仰荷靈心之眷始仗武功而定亂終資文德以
守成規模高越於百王恩澤旁周於四海遠者來而
近者悅大邦畏而小邦懷候及清商祥開載育臣某
行隨天運見應秋分自度微光無補九霄之月日願
言遐算長輝萬里之山河遙望闕庭聊陳口號
九曲黃河徹底清當年知有聖人生威行海外三千

國恩浹寰中數百城村落有田皆美稼閭闔無地不
懽聲同心願祝吾君壽億萬斯年饗太平

聖壽青詞

伏以金風肅物適當建酉之期琳館延祥爰紀生商
之瑞庶幾精意仰格高冥伏願皇帝陛下德合無疆
慶流有衍靈源浩浩既積石以爭流睿算綿綿與大
椿而比壽旁及羣生同蒙嘉祉

僧錄司齋意

躬率闔府官僚同發虔心詣開元寺山亭院敦請高
僧某等修建法筵祝延聖壽仰冀仁慈之鑒曲垂保

佑之禧伏願皇極安而四海清泰階平而六符正神
威赫赫罄大地以瞻依眷冀綿綿等靈椿而悠久

祈雨青詞

伏以人為弗淨故災異之沓臻天道無私惟精誠而
可格俯殫悃悃仰蹟高明中謝伏念某政失中和民
多怨讟過旱災而已甚復蝗害之相仍野草將枯農
心莫望輒敬遵於道範用懇禱於真庭伏望上帝溥
臨諸神孚祐俾甘霖之大沛庶嘉種之潛蘇千里疲
氓共獲秋成之利九重聖主永寬旰食之憂普錫餘
休均霑庶類

大祥薦母青詞

伏以乾坤有盡難忘鞠育之恩日月如流俄屆祥除
之日輒申哀懇仰蹟靈心伏念臣某惡業延災慈闈
棄養悵音容之永隔纏悲恨以無窮不憑資薦之功
恐滯幽冥之路敬邀法侶爰即家庭啟黃籙之妙科
禱蒼穹之列聖伏望靈光下燭貞馭來臨鑒螻蟻之
微誠歆橫汗之薄薦滌除羅垢罪垢脫九地之沉淪升濟
神明享諸天之快樂更祈餘福晉利全家

馮子文集錢疏

竊以無妻曰鰥是亦窮民之數周人之急其惟君子

之心况以散財乃可發身而見義不為無勇子文省
差箕裘繼業詩禮傳家騰達官曹實吾門之俊秀笑
談樽俎有乃父之風流通偕有室之歡俄值鼓盆之
戚內無家婦孰主蘋蘩上有孀親莫供菽水極至於
此命之如何頃因青鳥之媒載結朱繩之契其奈家
徒四壁囊乏一錢須遍告於達官庶共成於美事萬
錢相助當不愧於古人後漢李固一飲必酬誓無忘於厚
德儻蒙季諾毋吝鄙書謹疏

南冠贖身鳩錢疏

竊以遭亂喪家非男兒之得已傾心周急實君子之

當為脫季將軍之難則漢有朱家釋越石父之囚則
齊稱晏子古多好士今豈無人茲者儒士某派出高
門生逢厄運幸脫迹於戎馬戰爭之地復寄命于市
門商販之家零丁一身孤苦萬狀美玉方永於善價
明珠深慮於暗投宜逢高義之人力拯窮途之客伏
望激昂豪氣倡率同儕解疲驥於轅間出焦桐於爨
下五皮勿吝共憐百里之才一飯必償敢負王稽之
德如蒙金諾請掛玉銜

京兆府灞河創建石橋疏

竊以臺欲起於九重必資累土功或虧於一簣豈足

為山惟人心有好善之誠則天下無難成之事若此
長安古郡寔惟關右要津奈灞水之湍流為秦川之
巨患幸逢大匠誓建長橋願堅匪石之心端有移山
之志今則功緣垂就財力俱窮緬懷四載之勤豈可
半途而廢且見義不為則無勇勿替前言蓋作善得
吉者常多好觀後効如蒙全諾請署玉銜

又

竊以川惟設險不無泛溢之虞橋用濟人當作久長
之計眷長安之名郡帶灞水之湍流每逢秋夏之交
輒有波濤之害揭厲而涉者綿歷乎千載沉溺而死

者不知其幾人自非過間世之良工孰克建非常之
大事今有山東劉君者世傳妙斲誓救生靈疊巨石
於平灘架修梁於當路將使車不濡軌人無褰裳豈
惟為壯觀於一方寔足阜仁心於百世然而厥功甚
大所費不貲固知獨掌難鳴正要大家著力敬修短
疏遍詣高門伏望厚祿達官多藏巨室或黃冠上士
或白足高僧共推拯溺之心永絕憑河之患渡羣蟻
而甲科尚驗陰德之報不誣救千人者子孫必封昔
賢之言尤信如蒙全諾請署玉銜

京兆府重修大一元君上廟修緣疏

竊以品物生成雖資天地之力陰陽宣布寔賴山川之神維天一靈淑在終南奧境隱萬丈魚龍之窟司九天雷雨之權盖有感而必通諒無求而不應星霜荏苒棟宇推頽庶凡輪奐之一新須藉英豪之叶贊共成美事少答鴻庥十雨五風祈順成於年穀千秋萬歲慶永輯於皇家季諾僮蒙鄙書勿吝

為張經歷世傑恒齋銘

震剛在下巽柔在上雷動風恒從恒之象君子體之其道有常止於其所立不易方富貴貧賤毀譽欣戚一不動心介焉如石礚礚鄙夫惟世是趨翻雲覆雨

棄瘠涵腴猗歟張君以恒進德我銘斯齋勉而無斁

楊經歷省齋銘

天生萬物莫靈於人人之為人所貴者身惟茲一身以心為主心本虛明湛然靈府感物而動遂溺於私喪厥真淳乃誕乃欺聖門之學惟先自治其治如何省之一字朝誦夕察再思三思忠或未盡信或有虧善貴必遷過無吝改人欲既銷天理斯在顏淵克己孟軻守身三子一道遺訓生民卓哉楊君固嘗從事銘以勗之勿替初志

王彥修存齋銘

厥初生民本真渾然情實一開以人汨天爰有先覺
教之寡欲收其放心不遠而復性惟內守情靡外奔
其人者去而天者存君子庶民間不容指操之有要
曰敬而已猗歟王生粹然天資以存名齋亦允蹈之
孟軻養性顏淵克己彼何人哉有為若是

藥郎中母寫真贊

家肥而子孝義方之教身老而康強作善之祥班衣
楚楚蘭玉成行捧觴一笑春滿萱堂

晉陶處士畫像贊

惟皇有晉真此南方桓桓我祖奮彼戎行以蕃以屏

以期永昌時邁于衰厲階日起國無忠人豈無孝子
王家既移我室如燬薄感我私爰適予止燁彼菊矣
其黃維金鬱彼柳矣有蒂其陰浥浥在觥以酌以斟
孰云我樂我憂孔深悠悠南山寔知我心往往則逝
來者可悲嗟今之人邁此弗治自北徂南靡人克依
他岐孔多周道斯微心之憂矣曷其能知

跋文子堂家傳

始予來長安獲識子堂於羈旅中時年七十八矣出
雜文數篇老成卓絕殊類少年語既而知其潞公之
胄父兄俱以詞賦顯名南方其師友淵源有自來矣

惜乎早罹兵故流落不偶每一見之未嘗不為動心
雖然兵興以來蜀中士大夫夷滅殆盡間有漏網者
往往落人彀中至凌辱有不可勝言者獨吾子堂綸
巾褐衣蕭散物外翩翩然如冥鴻野鶴不可羈而有
也豈所謂不幸中之幸者耶其記問詞章為今羽流
第一加之潜心力學未見其止異時為元門領袖者
非子而誰子其勉之

跋陶淵明年譜序

詩家之有年譜尚矣所以著出處之實記述作之由
千載之後使人誦其詩而知其志不煩注釋意義朗
然蓋自唐宋以來諸名公皆有獨靖節先生闕焉今
紫陽先生始追而補之起晉甯^康詵宋元嘉六十三年
之間災變廢興班班可考學者先讀此而後觀陶詩
則思過半矣己酉重陽日謹跋

祭風伯文

伏以驕陽為沴甘澤愆期顧四野以如焚憫三農之
失望雲雖暫合風以漸驅敢罄微忱仰干靈鑒既少
停於披拂俾咸被於霑濡既荷殊休敢忘昭報尚饗

祭飛蝗文

伏以驕陽愈熾方深亢旱之憂沴氣旁流又致飛蝗

之害顧天災之沍降皆吏政之不臧敢罄哀衷仰祈
靈嶽仗神威而迅掃庶田穡之無傷仍沛甘霖用成
豐歲

祭勾芒神祝文

時惟孟春律中太簇爰出去牛以謹農候神佐蒼精
木官之臣著德立功濟世生民某來殿大邦惟農是
職裨弗庇休雖勸何益敢稽大典敬薦馨香神之聽
之錫以豐穰

灞橋破土祭文

昔鄭子產以其乘輿濟人於溱洧孟子以為惠而不
知為政然則橋梁之不脩我有司實任其責某承天
子之命來守此土凡可與民興利除害者皆當盡心
力而為之而不敢辭也惟茲灞河橫截大路當秋夏
之交山水暴漲甚為民患今將置石以架脩梁使往
來之人不死漂溺以廣天地好生之德庶幾副主上
愛民之心惟爾神其相之破土之初敢以誠告尚饗

謁城隍文

某承朝命來長斯邦凡四境之內一夫不得其所皆
某之責寔與有神分職幽明下車之初祇謁祠下惟
神其臨之尚饗

宣聖廟上梁文

兒郎偉我國家誕膺明命肇造丕基宣五葉之重光
協千齡之景運威加方外澤被區中永天桂海莫不
來臣日本月氏率皆聽命雖藉武功而定亂須資文
德以守成若稽古道敦尚儒風申勅憲臺勉勵學校
眷長安之名郡寔闕右之要津四方衣冠之所往來
八州士民之所觀望其異端之教竟金碧以相輝而
聖師之宮反風雨之不蔽幸遇某官允諧眾論共效
誠心發公廩之餘糧糧割己身之清俸選求良匠貿易
瓌材構大廈以垂成舉修梁而高架聊伸善頌以相

歡謠 兒郎偉拋梁東闕里衣冠在眼中要使秦民
知禮義挽回鄒魯舊家風 兒郎偉拋梁西艷錫相
望路不迷文武沒來千百載至聖風化在遺黎 兒
郎偉拋梁南不須金鼓下湘潭指日吳儂修職貢吾
君盛德與天參 兒郎偉拋梁北天威不遠顏咫尺
年年萬國會衣冠願比眾星長拱極 兒郎偉拋梁
上且喜斯文天未喪五雲缺處望奎星今夕光輝長
萬丈 兒郎偉拋梁下行看千區廣學舍養就堂堂
將相材端與皇家衛宗社 願上梁之後教化風行
英髦輩出一一抱淵騫之德人人懷游夏之才採百

氏之精華挾六經之蘊奧為聖賢傳正道為邦家建
太平社稷延休生靈蒙福

祭亡友郭周卿文

維至元五年八月日京兆教授李庭遣男謹以清酌
之奠致奠于亡友前行中書省員外郎郭君之靈嗚
乎哀哉惟君之德玉粹金精惟君之量嶽峙淵渟其
議論可以聳動臺閣其才氣可以彈壓公卿奈何稟
命奇拙遭時戰爭上無北海鶚書之薦下無汝南月
旦之評鬱素懷其莫展卒坎坷而無成此有志之士
所以拊心掉痛憤造物者之不平也况與君同鄉同

舍辱為友生周旋於場屋及流轉於兵塵者五十餘
載何嘗不同止而同行嗟晚歲之參差悵會合之難
并忽一憤而不起竟埋玉於佳城嗚乎哀哉然而君
之行義信於一鄉名譽達乎朝廷二子成家玉立崢
嶸有財可賈有田可耕年開七秩而死亦可無憾於
冥冥矣平生故人零落殆盡惟我與君落落相望如
曉月之伴長庚君今先我而逝雖獨在何以為情因
老稚之告歸書片紙以寓誠魂若有知飲此一觥嗚
乎哀哉尚饗

故宣差絲線總管兼三教提舉任公誄辭

維大朝丁未歲某月日宣差平陽太原陝西三路絲
線民戶總管兼三教提舉任公卒于太原春秋五十
有六秋八月公夫人與其弟奉靈視歸長安將以某
月日葬於某前京兆行部郎中邛公既撰墓表仍命
晚進李庭為誄辭公名家子自幼力學業進士在場
屋間聲華藉甚雅有大志常撫几慨然思效用當世
以立功名適遭變故流離久不得逞大朝開創初設
科舉以詞賦擢上遊授府學教授今參政慮公其甥
也方蒙上眷倚因薦公於朝兩賜召見恩禮甚渥乃
命總督三路繭絲之稅兼領三教事公既久遊民間

知時利病憫遺黎之凋瘵憤聖道之晦蝕誓欲剔除
宿蠹振起儒風使大東無告病之詩子衿免廢學之
刺闕中士民亦引領北望顛顛然如飢兒之待哺也
輅軒既南卒於中路訃音一傳遠邇嗟悼衣冠為之
褫氣朋友為之痛心嗚乎哀哉當波瀾洶怒之時風
雨交至之際而巨航沉覆大厦傾頽洒三江之水以
為淚不足以泄其哀震九天之雷以為聲不足以摅
其恨困窮之民誰與撫摩孤寒之士誰與慰藉徒使
貪婪快心忌媚得志也嗚呼噫嘻殆上天之意未欲
平治歟抑素王之道將遂湮滅歟不然何奪我公之

遽也僕與公有十五年之舊經亂睽違久矣前年冬
始會於洛水之北置酒談笑竟夕懽甚既而有書相
招故今年春挈家來長安擬依公以為生竈突未黔
公其死矣撫棺長號肝膽摧裂奈何奈何雖公之壽
命脩短有數固亦吾之平昔數奇所向多屬福也夫
誅者所以累其功德而哀之爾公有康濟天下之心
未及施為而逝百姓不得被其澤四海莫能知其心
尚何言哉今但形容一時人情所以思慕公者蓋如
此亦足以質其誠心所存有不可掩者使天少假以
年得盡底蘊則其所成就為如何也若公之世系與

夫出處歷官之祥有邛公之墓表在茲故得以略之
誄曰維古長安衣冠淵藪煌煌任氏世德斯茂淳深
畜羸以惠厥後是生我公為時俊秀舒英吐華焜燿
文囿孤雄一鳴羣雌東味風塵冥冥逢此格鬪羈旅
十年懷寶不售六合屯蒙初覩清晝嗷嗷遺黎尚多
疾疫內構實耻纓冠斯救迢迢君門萬里一叩蜿蜿
老蛟久伏蛙鼃晚遭風雲始引其脰方騫方騰俄墜
而踣平生志願千不一就埋玉重泉百身莫購嗚乎
哀哉初參政公垂髫而孤孰恤孰收舅氏勤劬六翮
既舒奮飛天衢卒成宅相光我門閭明明天子作其

即位仍爾百僚孰濟予治維參政公知公之志為國
舉賢甯以親避曰臣有舅可任以事乃引乃贊乃見
以贊帝曰俞哉汝往其試爾稅不均汝其理之聖教
將頽汝其起之公拜稽首曰臣敢辭有華其車四牡
翼翼載瞻河山伊邇鄉國畫錦方榮夜臺已逼銘旌
北來行路沾臆嗚乎哀哉蕭條紫荆破屋荒城努力
蠶繅以應王征惟彼貪人已私是營我杼其空爾篋
之盈剝我脂膏豐爾牢牲子子鰥嫠叫號求生庶幾
公來少緩煎烹今其死矣孰察斯情干戈以來儒術
陵替通經者復國有明制維彼括克梗我天恩華門

圭竇^虐以毒稅^虐逞逞貧士欲逞無計庶幾公來叫閭
新帝今其死矣孰拯斯弊嗚乎哀哉水有蛟龍網罟
不施鼈魚鰕鮓涵泳嬉龍既亡矣漁人昌矣擾擾
鱗蟲維其傷矣山有猛虎斧斤不入檜柏松杉參天
蔽日虎既躡矣樵蘇至矣鬱鬱穹林維其悴矣嗚呼
哀哉謂天盖高漠漠無知胡為日月盈縮不私胡為
寒暑往來應期謂天有神報施不忒胡耕之羸而虎
之力胡矢乎回而壽乎趾心存蠹物天必優之志在
利人天必讎之悠悠造化有柄孰尸紛綸茫昧莫測
其為直諒剛明深沉磊落嚼酒噴詩劇談縱博不見

幾時忽焉寂寞萬斛英風拘窘一櫛嗚呼哀哉浩然
之氣有聚散乎湛然之性無虧成乎出入化機本無
心乎宜數已定莫能逃乎蒼天無語吾誰是詰聖人
不作吾難是質公方偃然寢於巨室我徒但化數噉
奚益天穹地大歲月無涯俵俵行旅曷日還家體同
太虛蟬蛻浮華公乎何憾士民之嗟嗚呼哀哉

元李顯卿寓庵集

故諮議李公墓碣銘序

至元壬午夏四月二十日諮議李公卒於安西學宮
之西館享年八十有四將葬其子居仁輩哀絰纍然
執隴右憲司經歷李君晉臣之狀涕泗謂予言先人
平生文行卓然以時命不偶故不大見事業於世竟
賁志下泉惟是表章於後者墓當有碣碣當有銘敢
以屬筆為請若惠顧而不拒孤子之厚幸也予辭以
文力骫骳不足以發揚先德則再拜曰願終允之乃
諾而銘諸公諱庭字顯卿華州奉先人幼罹兵亂上

世名諱與其事迹無傳可錄考諱郁少明城旦書為
郡法曹凡所讞當一歸平恕鄉邦稱文無害尚氣義
重然諾三娶母氏薛張雷公張出也蚤逝雷撫過所
生性穎悟齟齬入小學日記千餘言法曹府君欲令
讀律公曰申商之法豈能加於周孔之道學儒不愈
乎府君大奇之即為擇師訓勵篤十餘歲已有能詩
聲十六應詞賦進士舉比弱冠兩預鄉荐一赴簾試
方唾手取青紫而金季已亂離矣其審於擇術如此
二親捐館逃難奔竄於商鄧山中歲歉無食人相魚
肉公獨煮木芽溪毛以沃飢甯殍不隨眾武弁王帥

性嚴急素敬愛心每苛下以非理公輒勸解中為之
霽威眾皆賴焉其仁化強獷如此北渡居平陽董府
君之館教授生徒日與胎溪麻信之盤谷李濟夫游
從二子文章鉅公也商椎質難方日加益而不自知
甲辰歲中書胡君行省陝右辟公為議事官執方守
正不能詭道隨時居無幾即揚衣徑還奉先復與郭
濂溪周卿郭太華器之王安素壽之盍簪切磋講習
有日新之功焉會紫陽煥然參議宣司尺書以招公
即應命長安名士之淵數也如楊寺丞君美裴綠野
子法邳郎中大用張郎中君美同講議祖卿焦諮議

元發來講議明之皆魁才巨德又得與之文酒相徵
逐則智刃日益利文憲日益開取心注筆浩乎其沛
然矣公天姿既高凡遷皆翺翔於名公之間其能取
諸人以為善卓卓自成立如此中統元年廉相國平
章商叅政左山復蒞宣撫之職即署公為講議事有
不便言無隱情必至得中而後已其知自處之分如
此左山少日常與公同研席知其貧素伴餽束幣謂
來使曰此賜無名吾相有妄與之舉不肖蒙苟得之
恥與其俱失曷若兩全竟却之其明於辭受之義如
此至元丙寅有獻諛於秦蜀省官欲為立德政碑者
謂公曰若可當筆所潤至厚幸毋拒也公曰德政有
無昭昭在人焉可誣也竟峻謝之其不為利回如此
至元庚午勅授京兆教授以斯文為己任凡授學者
一經指諭悉有儀度可觀文廟之頽圯者建白而更
新之南冠之繫維者引手而援出之為學官首尾三
十年英胄貴彥達官顯仕多出其門其成物之功如
此至元癸酉安西開府首以公與楊潛齋諮議王府
事示養老優賢也公雖以文章名世而沈潛於性理
之學言無瑕玷行不崖異一舉足必以忠信誠寔為
本故與物無怨惡不即人而人即之其自得之深如

此平生所為文章有寓庵大全集若干卷詩材羣玉山集三十卷夫人納合氏金源名家子男三人伯即居仁業儒主韓奕簿仲曰居敬有幹蠱稱季曰居義亦在仕女一人適同州醫正嚴永昌先公卒男孫六人俱幼竊嘗論之士之出處顯晦者才與命而已半途而廢不成焉者不論也才而遇則致君堯舜躋民仁壽建功當世流芳無窮亦常事也如不遇焉則讀書樂道教育英才言而世為人所誦行而世為人所法天壽不貳俯仰無忤是亦為政奚其為為政嗚乎公平亦可以無憾於九原矣銘曰 官雖不崇德豈

不充祿雖不豐學豈不工司命乘除何啻於公為善報福効未昭融非公非躬後人之隆刻我銘章以表

幽宮此文先生之墓過者肅恭

王博文撰